

欽
定
全
唐
文

欽定全唐文卷六百十九目錄

張正甫

衡州般若寺觀音大師碑銘

并序

代路中丞謝先人贈官表

劉全白

唐故翰林學士李君碣記

崔漢衡

蓮華峰銘

戎昱

澧州新城頌并序

李寧

對不供祭用判

劉丹

西郭橋記

陸參

長城賦

姚庭筠

請奉行律令不得隨事輒奏疏

尹樞

珠還合浦賦

華山仙掌賦

劉積中

樂德教胄子賦

徐至

樂德教胄子賦

皇甫威

迴文錦賦

鄭方

樂德教胄子賦

趙殷輅

山雞舞鏡賦

欽定全唐文卷六百十九

張正甫

正甫貞元二年進士官鄧州刺史歷同州轉蘇州元和八年遷湖南觀察使十三年除大理卿

衡州般若寺觀音大師碑銘并序

天寶三載觀音大師終於衡嶽春秋六十八僧臘四十八元和十八年故大弟子道一之門人曰惟寬懷暉感塵劫遽遷塔樹已拱懼絕故老之口將貽後學之憂丕若貽謀思揚祖德乃列景行託於廢文彊名無迹以慰乎罔極之

金史卷之二十一
恩曰自騰蘭演教於此土也殆將千歲達摩傳心至六葉
也分爲二宗不階初入頓入佛惠曹溪教旨於是乎傳宏
而信之觀音其人也大師諱懷讓京兆杜氏其先因家安
康卽爲郡人髫年俊發聰悟絕眾羣言所涉一覽無遺居
常而未或好弄在醜而不可褻近嘗嘿觀止水因而顧影
形儀畧若宛在鏡中三反厥像如初沛然而心乎獨得還
步未輟聞於空中曰佛法津梁俟子而大旣應付囑爾盍
勉之乃深割愛緣亟從剃落以荆土律藏之微密也大士
智京在焉攝衣從之旣進而儀法峻整冠於等輩以嵩嶽

禪之泉海也長安長老在焉稽首咨之既授記而身心自在超出塵垢厭離文字思會宗元周法界以冥搜指曹溪而遐舉能大師方宏法施學者如歸涉其藩閫者十一二焉躋其室堂者又十一焉師以後學弱齡分爲末席虛中而若無所受善閉而惟恐有聞能公異焉置之座右會一音吹萬有衍方寸彌大千同焉而交暢異焉而脗合同授祕印目爲宗師乃陟武當窮樓十霜竭來衡嶽終焉是託惟般若聖槩有觀音道場宴居斯宇因以爲號或微言析理辯士順風而杜其口或杖屨將撰山靈借留而規於夢

遠自梁益近從荆吳雲趨景附風動川至靈山聖會今古
一時至矣哉未始聞也一公見性同德宏教鍾陵鬱爲名
家再揚木鐸而施及寬暉繼傳心燈共鎮國土乃追琢琬
爰揭於故山揚其耿光以示來刼其受法弟子亦序列於
左式明我教之有開焉銘曰

不疾而速平平南宗窮行其教嶽嶽讓公秀發之英激於
童齒出塵之像光於止水乃趨律會儀範孔修乃探密藏
先覺同求曹溪實歸般若觀妙體是宗極湛乎反照一從
委順六紀於茲教跡未衰靈峯歸而一公丕承峻其廊廡

寬暉繼起重規疊矩乃掃塵塔乃植豐碑率是教者茲焉有歸

代路中丞謝先人贈官表

臣某言伏奉某月日恩制追贈亡父先臣某司空積感昭靈肅膺嘉命捧戴綸旨哀號靡及追榮袞章沒世無覩先臣某策名昌運不待聖明錄功上台載彰忠烈陛下以臣兄應理行有聞擢居連率光賁重渥慶流三泉此皆陛下代天永錫論道成於故事俾臣兄弟移孝歸於盡忠悲喜交心拜舞以泣不勝感咽崩摧之至

劉全白

全白貞元六年官膳部員外郎出爲池州刺史十一年徙吳興遷秘監致仕

唐故翰林學士李君碣記

君名白廣漢人性倜儻好縱橫術善賦詩才調逸邁往往興會屬詞恐古之善詩者亦不逮尤工古歌少任俠不事產業名聞京師天寶初元宗辟翰林待詔因爲和蕃書并上宣唐鴻猷一篇上重之欲以綸誥之任委之爲同列者所謗詔令歸山遂浪跡天下以詩酒自適又志尚道術謂

神仙可致不求小官以當世之務自負流離輶軻竟無所
成名有一子名伯禽偶遊至此遂以疾終因葬於此文集
亦無定卷家家有之代宗登極廣拔淹滯時君亦拜拾遺
聞命之後君亦逝矣嗚呼與其才不與其命悲夫全白幼
則以詩爲君所知及此投弔荒墳將毀追想音容悲不能
止邑有賢宰顧公遊秦志好爲詩亦常慕效李君氣調因
嗟盛才冥冥遂表墓式墳乃題貞石冀傳於往來也貞元
六年四月七日記

崔漢衡

漢衡博陵人始爲費令滑州節度使令狐彰表掌書記大
曆六年以檢校禮部員外郎充和蕃副使遷右司郎中改
萬年令建中三年爲殿中少監兼御史大夫再充和蕃使
改鴻臚卿轉祕書監俄拜兵部尚書東都淄青魏博賑給
宣慰使明年爲幽州宣慰使貞元四年加檢校吏部尚書
晉慈隰觀察使尋加都防禦使卒贈左僕射

蓮華峰銘

蓮華巍嵬竹箭喧厖浩浩今古憧憧往來

戎昱

昱德宗時人元和朝官朗州刺史

澧州新城頌并序

詩曰赳赳武夫公侯干城美賢人將帥折衝於未然也自周建五長秦制百郡地非城不安故分諸侯之符美專城之稱尚矣澧州荆之近庸國之南屏水陸吳楚風俗夷獠溪蠻好亂相寇仍梗澹津之墟尚在天門之壘可辨慮危杜漸非賢孰能古城之東垣不盈百仞地偏而僻署斜向日正而陰陽氣互遂使災沴屢降水旱更作乾元中盜不盈百卽州將失守間歲微瀘軍潰卽郡人塗炭向使崇堵

可固廩藏是蓄何蕞爾之寇得殘生人乎前年春天子輟
伊呂之佐而牧守澧公行不加懼布無恩之惠人和樂而
不使公嘗曰一日必葺其墻宇而况於城池乎遂度木於
山浮木於水選巧匠於退卒就嗇夫於庸保人急於利役
無勞焉因舊址而板築雲集創新規而雉堞霞映峭壁屹
立修廊虹亘訟堂鈴閣從儉制焉不三四旬功乃就矣倚
連岡以起伏面長江以演漾登觀則山川在目雄鎮則黔
巫可抗澧人歌之曰可憐地上樓百姓不知修上有清使
君下有清江流雖臧質石城之謠不是過也耳目風化得

無頌乎

敬危江城榛蕪上平解宇改卜垣墉半傾肇自二紀凶渠
再驚廩不我食人不我生大賢爲政革故鼎新畚走鍤舉
棖衝忽陳俄聳雉堞如驅鬼神雖崇澧城不勞澧人南樓
峩峩下壓澄清畫角曉吹啼鳥夜過浦珠自還野童自歌
我公之祉如山如河

李寧

寧元和中官常侍

對不供祭用判

欽定全唐文

卷六百十九

李寧 劉丹

六

景奉使沈埋虞人不供其用

社稷五祀山川百靈有國有家是尊是奉徧羣神而致享
理四時而不忒爰以使臣巡行郡縣職茲望秩之事崇是
沈埋之禮或陳典法無替虔恭况徼福假靈沈璧埋幣罔
不祇肅通乎至誠蘋藻方薦粢食不鑿禮官博士分典斯
務庖人尸祝各守是司事或有違罪將何逭且我愛其禮
闕供是其寘罰神歆其潔克誠可以享斯眷彼虞人掌茲
山澤不守其祀自貽厥愆宜寘平刑以懲不恪

劉丹

丹貞元十年官郢州長史

西郭橋記

聖人肇始造舟後代相沿不易梁澹有服隨之說棧劍爲
資蜀之要取諸大壯以濟不通於梯山之徒納職之命傳
國之利厚家之貨不可斯須而廢其有不欺女信嫉惡蛟
毒良以期徵於納履讓或伏身於見執發機雖異而致名
之蹟同也夏禹疏洪水除其昏墊庖犧乘馬牛廣乎運載
皆垂致遠之計將以貽厥後嗣國以人爲本民以食爲天
行李滯塞何由遂於謀生哉以身觀身以國觀國自天子

至於庶人無有不因力制造取贍於民之業矣楚郢之境
西浮漢江草創之始東馳京嶺古風遺事有陽春白雪之
美淒然不變中改溫中之邑仍角陵之井次易新陽之號
立京山之稱會府無巨川之濟歸里及巾車之敝誓心無
題柱之所攜手絕敘離之地冬涸則邱坎險塞夏漲則奔
騰浩淼憧憧來往行人阻之我州尊榮陽鄭公權衡以心
利劍在手辭北闕以作牧褰赤帷以御人必能剗剔奸邪
懲革污俗不然何以克成斯役以安疲庶京兆韋于屈爲
宰服黃綬於鄂渚綰銅章於郢上下馬而黠吏破膽愛民

而政聲盈耳先難後易靡不有初恕已檢躬終亦如始矧
能貶食省用均賦守官捐不急之徭行以時之政木取於
市百倍於市價庸於工畢樂於工可謂悅以使民民忘其
勞也鑿堆補罅遷曲於直夷陵就谷奠礎於水平板幹法
於砥礪具畚築削於高阜凭修闌而植髮運眼亘虬梁而
晴虹可指然後施諸赭腹以皛粉飾樹華刹而表道刻堅
珉以旌德不惟招襁負接土物抑乃光里閭壯郭郭使後
躅動思賢之詠居人懷勿翦之感予名竊佐州承牒觀風
兼以求瘼覩奇蹟而不刊不立孤爲寮而徒飲徒啄書之

於石以彰永好甲戌之歲建卯戊午之日且題且記告於
守者

陸參

參吳郡人第進士貞元中官祠部員外郎

長城賦

干城絕長城列秦民竭秦君滅嗚呼悲夫可得而說原夫
恣無道戮無辜帝語其朕亡秦者胡不可知也疑是匈奴
於是先蒙恬次扶蘇帥兵伍役刑徒千里萬里雨驟而雲
趨入胡之鄉卻胡之王北胡之黨削胡之疆然後自于洮

至於遼江漢湯湯將池焉而共浚太山巍巍將城焉而共
高欲限華夷決安危一世萬世有中原而稱大帝想其初
也闢遐荒窮下土極九泉而深望九霄而樹千夫力殫目
不暇睹有力如虎亦不暇努咫尺之間或什而伍萬婁瞠
瞠亦不暇數人氣氤氲成一方之雲洒汗瀟瀟成半空之
雨駕肩而趨踵步而履紛紛囂囂如日中之市國不得而
寧役不得而停伊朝繼夕自昏達明時若炎風熾烈川原
盡竭枯肌外焚內火中竭是民咿咿憂秦未拔至若苦雪
初霽陰風雨霜凍髭折鬢冰寒夜腸是民惶惶憂秦未亡

民之既酷載僵載仆飢兮不粟寒兮不服病不暇休蟣不暇沐基人之骸壓人之肉少者不遑老者不復秦民嗚嗚向城而哭邊雲夜明列雲鐸也白日晝黑揚塵沙也築之登登約之閣閣遠而聽也如長空散雹蟄蟄而征沓沓而營遠而望也如大江流萍其呼號也怒風剗剗其鞭朴也血流縱橫地祇業業終朝忽噩星辰悠悠畏相其接而况於夷狄而况於臣妾其運輸也巷無居人田無稼民牛首滅滅大車轉轉輪不暇徙蹄不暇奔其傷財也極民之賦虐民之賂糊口而供赤立而赴餓殍塞路亦不我顧其民

吹吹面天而訴將以宏其基恢其堵盡韓齊之土固其壁
崇其飾竭億兆之力太華方城乃一拳之石旣而岌業崢
嶸向秦而橫如山之成如雲之平繚繞無際亘如長鯨豎
亥汲汲步不可及掩暎天漢勢不可算邱陵峩峩不及其
半影人沙磧勢侵西域殘陽不來未昏而夕其堅如金其
峻如林崇高不可以目辨遠大不可以數尋鳥飛不前其
歸翩翩雲不得施其陰絲絲風不得馳其聲喧喧下視關
塞蝸牛蟬聯回顧宮闕狀如微烟胡人駢連望之巍然如
登青天如臨深淵不敢久視鳬趨而旋嗟乎城卽高大民

惟艱難聞之者攘臂而切齒觀之者涕泣而長嘆夫如是
刑不得不暴政不得不煩國不得不亂民不得不殘謂其
城可以固宗社謂其暴可以定人寰奈何敵不在遠憂不
在胡城未畢也而秦已無殊不知棄秦者身寇秦者臣喪
秦者嗣敵秦者民而怒秦者鬼神此可憂也而秦弗憂徒
欲竭生民壘胡塵萬里而塗炭十年而苦辛然且喪其民
亡厥身非城也去仁義積土石非城也是曰禍之門是曰
滅之根安得而爲防安得而稱長嗚呼謂險之可恃城之
可保則右彭蠡左洞庭不爲堯之征面伊闕背羊腸不爲

湯之亡是以處堯之宮行堯之風雖無是城也不可得而亂不可得而攻用秦之威布秦之非雖有是城也如藩垣之微如閫闔之卑無以防其患扞其師不然者秦無得而殃城無得而荒本以爲禦而反以爲亡者哉

姚庭筠

庭筠貞元九年官御史中丞

請奉行律令不得隨事輒奏疏

律令格式懸之象魏奉而行之事無不理比見諸司寮案不能遵守章程事無大小皆悉聞奏臣聞爲君者任臣爲

臣者奉法故云汝爲君目將司明也則知萬機務綜不可徧覽也所以設官分職者委任責成百工惟時以成垂拱之化比者或修一水窗或伐一枯木並皆上聞疏展取斷宸衷豈代天理物至公之道也自今以後若緣軍國大事及牒式無文者任奏取進止自餘據章程合行者令令準法處分其有故生疑滯有致稽失者請令御史隨事糾彈

尹樞

樞貞元七年進士第一時年已七十餘

珠還合浦賦

以不貪爲寶神物自還爲韻

驪龍之珠無脛而至駭浪浮彩長川再媚迴夜光之錯落
反明月之瑰異非經漢女之懷寧泣鮫人之淚狀徵既往
莫究奚自偶良吏兮斯來遇貪夫兮則悶想夫旋返之儀
圓明可期輝如電轉粲若星馳光浦澈竄蛟螭映沙礫晃
漣漪在暗而投誠則悲路人未鑒沈泉而隱亦常表帝者
無爲欣出處兮據德幸浮沈兮中規是以特表殊姿潛懷
有道中含逸彩上繫元造醜當時之饕餮應爲政之美好
真列郡之尤祥實重泉之至寶於是煥清瀨輝淺灣奔璫
璨走爛斑豈能與石前卻隨流往還泛連波之下盈一水

之間而已哉茲川兮始明老蚌兮勿剖瓠瓠兮罷笑瓊瑰
兮莫偶抱圓質而胥旣揚衆彩而未久方載沈而載浮且
曷澣而曷不玉非寶泉戒貪實爲國之司南誠感神德繫
物在爲政之不拂愚是以頌其寶而悅其人美斯政而感
斯珍想沿洄於舊渚念涵泳於通津則知美政不遠嘉猷
入神故中潛皎晶下沉齋淪轉則無類磨而不磷誠丹泉
之莫擬諒赤水之非珍苟或疑此爲虛誕願徵之於水濱

華山仙掌賦

以化作有端遙
存麗壯爲韻

覽削成之峰見靈掌之狀拓跡崇岫據奇疊嶂迢亭上竦

赫奕東向高蹤可覲猶存二華之間纖指遙臨遠蹠重霄
之上爾其依峭壁據崇巒排物外撫雲端羽客遐指都人
竦觀據開闢之殊致若騰陵而上干惟昔巨靈啟斯太華
拓崇崇而喬嶽西靡決浩浩而洪流東下故能遵八川安
萬化幹厚土存中夏姜嫄歆於帝武跡可相倫伯禹導於
龍門功亦齊霸厥道可遵厥狀斯存仰推天漢遙臨國門
蓮萼高生如將攀擷桂枝傍倚狀欲攀援試冥搜於元造
諒遺跡於坤元若乃傍攀冥蒙上指寥落右倚岑嶺左臨
絕壑紛詭狀之無朕諒神功之有作星壇未沒必俟於捧

持石鼓常鳴庸非其拊搏揖之永久斯爲不朽嗟列嶽之
所無小終南之何有喻天地惟資於一物拯沈溺豈藉於
煩手常抗跡於介石乃遺芳於崇阜依乎沕寥揭彼嶢嶢
聳眙眙於千仞擢纖纖於九霄折若華於暮景捧麗日於
晴朝旣瞻眺之無斂望提攜之匪遙共仰瓊姿徒懷壯麗
如排霧雰似拂昏曠遐窺巨跡猶存體物之辭迴瞰崇朝
暫寫凌雲之勢

劉積中

積中貞元中進士

樂德教胄子賦

以育材訓人之本爲韻

惟天惠人惟王司牧必資立學以化被聚賢而政肅樂垂
六德允接於生靈人抱七情於是乎修睦故命樂官宣樂
德之旨教國子俾國人思服施行而萬邦作乂動蕩而羣
生茂育原其詔司樂闢靈臺選國中之胄子集宇內之瓊
材示中和於前俾行而不怠尊祗庸於次將守而不回實
克孝而克友必無間而無猜緬蹟謨猷明徵義訓樂同和
而會極綱有條而不紊中爲忠告俾邪者奉忠格之心和
乃適正制剛者守調適之分非有象以外感乃無聲而潛

運祗敬不逾庸言是尊率威儀而允淑致言行之惟醇睦
烝烝之孝誠全乎天性勗怡怡之友義原乎天倫設教之
規爰立列樂之事方陳是將崇德教播成均議道自己建
中於人夫就學必時爲樂在茲春誦夏弦順陽而樂功猶
懋無虐無傲率下而樂德增丕所以舜命伯伯讓夔立之
以四教道之以六詩然後樂制敦浹國經允釐通至性於
倫理垂善教於師資慕其人則遐不謂矣仰其教則學以
知之方今政舉道光文修武偃播崇德爲宣風之始訓國
子爲化人之本忝承教之在躬庶聲名之不遠

徐至

至貞元中進士

樂德教胄子賦

以育才訓人之
本爲韻依次用

至哉樂爲德也保太和茂生育是以先王法之以成教樂
正尊之以示睦將磨琢於仁義匪鏗鏘於匏竹洋洋乎節
以惠和煦煦然致其恭肅其儀不忒故容止可觀其道既
宏乃進退可復信月將而日就庶不詔而不瀆且有教無
類道之原來廉讓之風斯扇愷弟之德不回趨隅以繼其
志待問以成其才於以見易和之容參於前也中庸之德

夫何遠哉何必朱千玉戚一起一僨將以宮商克懸角徵
潛運鳧趨碧沼皆籍籍於令名魚貫青衿各惜惜於淑問
百行由是內融三德於焉成訓俾夫遷善者樂以陳修已
者德以真樂者樂也可以樂其孝友德者得也可以得其
忠臣昔后夔所以推其典樂虞舜所以稱其聖人豈不以
人心感樂樂其有倫者哉今國家德教綏於九有禮樂達
乎四維樸素遠符於軒氏和樂方軼於周詩多士濟濟百
寮師師明誠之德可見中和之樂在茲自君臣達乎父子
性成也何莫由之由之伊何行之非遠亦由端本去末化

遐自閫然後外可以維城中可以補袞於與樂乎實教人之大本

皇甫威

威貞元中進士

迴文錦賦

以文思精絕古今傳賞爲韻

彼美人兮懸隴雲念塞上之征客迴機中之錦文千里馳心十年誓志想關山之延夢託丹素而垂意札札鳴杼紛紛積翠校曳緒而龍迴錦披雲而鳳至情生萬象功歸一
致綠爲芳草怨王孫之不歸紅作仙花發美人之幽思懿

夫達其意者在乎誠爲其藝者貴乎精顧異物之可賞諒
同心之所成離披而芳樹搖影煥爛而明霞近榮振素手
以鳴機蘭閨霜集斂翠裁而續縷紗窗月生則知妙極十
全才先一絕旣以彰其意亦以表乎節類乎錦卓氏服以
妍精言乎詩謝女慚乎清切稽六義而不忒方百花而迴
別心惟念遠將續縷以同營字是迴文與愁腸而共結成
乎手發乎心銳精思而在今方之紈比之素積元功而冠
古笑草露之輕薄勝林花之新吐宛矣麗矣錯金彩以成
章寂兮寥兮零玉筍而如雨於是披閱風前光文爛然百

花互進五色相宣文彬彬而愴矣彩重重而恨焉匪類雕蟲工乎織豈徒悅目寄乎邊寫片心之贈遠代尺素之相傳一則託乎情一則存於想謂乎錦也可裁心乎足賞君乎君乎發緘封知精誠之不爽

鄭方

方貞元中官監察御史

樂德教胄子賦

以育材訓人之本爲韻依次用

國有學家有塾播樂德之文采率胄子以化育始先激其清濁而後攻其節目鼓篋之士宣聲音以相和挾杖之時

俾心志而思服語於效者執德不回道以樂者知陽必來
盈耳之聲詎作理心之教有開實俎豆之聞矣寧鐘鼓而
云哉動於外而暢於中使和其性進以德而舉以事各盡
其才惟其敦學必有謨訓咸養以致和強學以待問觀德
畢賢愚之貫序德同長幼之分豈不以樂之至也通乎神
教之至也慎乎身惟彼樂之爲德是彰教之有倫不在匏
竹設金石振乃貴於祗庸備孝友陳豈不念終始而典樂
美教化於成均遂乃與誦諷觀屈伸斯可以移風易俗不
止於溫故知新保和於心暢五聲而授之有道將遜其業

崇四術而宏之在人厥類可知允懷在茲諒審樂以知政
由切問而近思初感至音聽角聲而惻隱變矣終懷雅性
聞羽奏而寬大似之且被之以簫管加之以訓辭升學而
在於春候合射而戒於秋時然則不教以中和不能知樂
不教以博依不能安詩是以學者爲王化之端樂者繫國
風之本故曰觀大學之道然後剛知困而滿知損

趙殷輅

殷輅貞元中進士

山雞舞鏡賦

以麗容可珍照
之則舞爲韻

雞開美錦鏡隱蟠龍雞則彪炳兮五雲之狀鏡則清澄兮
止水之容是得比形鼓舞偶影相從蹀躞初臨向月輪而
迴眸婉婉翩翩將顧映菱花而疊足重重質貌既異威儀
可覩進退雅符於節奏曲折冥契於規矩投身宛轉若赴
簫韶之音矯翼連軒似合桑林之舞形其動矣影亦隨之
類壘簾之並得同律呂之相追故人之視焉知分形之有
別禽之悅也謂一體之無疑不馳心於綠水自結念於丹
墀豈比夫在仙都而思曉入雅頌而興詩者哉徒觀夫雞
不倦臨鏡無疲照覩其形而屢舞謂其侶而相召寧知大

樂之同和自合無聲之要妙且鑒物兮在我故欲照兮無
可無不可其稟氣也合德諒茲舞而有典兮有則儻日而
鳴遇陰而息雞之在鏡類鸞翔之入雲空鏡之納雞若朝
霞之映潭色原其始也徘徊山谷縣厯星辰每念栖於丹
闕茲獲貢於虞人由是辟荒徼入函秦優游青禁顧盼紫
宸則昔之在山也雖蘊姿而誰語今之舞鏡也方呈質以
效珍孰與夫翻飛青崖之側昭彰幽洞之濱五德備兮其
容不細眾彩煥兮厥狀逾麗幸朗鑒之斯臨莫獻奇於魏
帝

欽定全唐文卷六百二十目錄

韓伯庸

幽蘭賦

李公進

幽蘭賦

郭炯

西掖瑞柳賦

李復

收復瓊州表

周愿

牧守竟陵因遊西塔著三感說

崔行先

爲昭義王大夫謝賜改名表

爲王大夫謝中使招撫狀

爲昭義李相公謝賜臘日口脂狀

臘日謝賜口脂紅雪等狀

爲王大夫謝恩賜口脂歷日狀

謝恩賜春衣狀

謝恩賜春衣狀

謝賜貞元寺額狀

爲昭義李相公賀雲南蠻歸附狀

奏差赴唐州行營軍馬狀

獨孤良弼

并州太原縣令路公神道碑

竇克構

請取前銜赴選奏

劉宇

河東鹽池靈慶公神祠碑陰記

姚綱

祭研射山神文

元友諒

汶川縣唐威戎軍製造天王殿記

張賁然

忠武將軍茹公神道碑

欽定全唐文卷六百二十

韓伯庸

伯庸貞元中進士

幽蘭賦

以遠芳襲人終古無絕爲韻

陽和布氣兮動植齊光惟彼幽蘭兮偏含國香吐秀喬林之下盤根眾草之旁雖無人而見賞且得地而含芳於是嫩葉旁開浮香外襲旣生成而有分何掇采之莫及入握稱美未遭時主之恩納佩爲華空載騷人之什光陰向晚歲月將終芬芳十步之內繁華九畹之中亂羣峰兮上下

雜百卉兮攢叢况荏苒於光陰將衰敗於秋風豈不以處
地稍幽受氣仍別蕭艾之新苗漸長桃李之舊蹊將絕空
牽戲蝶拂花蕊之翩翩未遇來人尋芳春而采折既生幽
徑且任榮枯暮輕烟而惹翠帶淑氣而紛敷冀雨露之溥
及何見知之久無及夫日往月來時占歲覩遇達人之回
盼披荒榛而見取橫琴寫操夫子傳之而至今入夢爲徵
燕姑聞之於前古生雖失處用乃有因枝條嫩而旣麗光
色發而猶新雖見辭於下土幸因遇於仁人則知夫生理
未衰采掇何晚幽名得而不朽佳氣流而自遠旣徵之而

見寄願移根於上苑

李公進

公進字德昇官右衛兵曹參軍

幽蘭賦

以遠芳襲人終古無絕爲韻

幽有寂兮蘭有香香者取其服媚寂者契其韜光是以綠
葉紫莖偶貞士而必佩深林絕壑挺奇質而獨芳觀其異
彩特秀結根自遠靡生於門寧滋於畹朝陽照而雜花不
得間其榮光風轉兮眾草無以齊其偃杳杳深處芬芬絕
倫保貞操以擅美發英華以藻春葉凝露以珠綴花含烟

而色新移於友也則斷金之利樹之庭也則如玉之珍豈
比夫協夢呈祥表嘉名於鄭國循陔見采流雅詠於詩人
而已哉蘭之幽兮芳可折幽無人兮芳不絕蘭之生兮美
自豐生得地兮美無終故雖敗於涼飆諒有嘉於前古方
比契於松筠詎齊名於蘅杜且夫麗白雪之綺靡被長坂
之芬敷激餘芳以孤映極幽致而自殊則在握者何有居
澤者何無蘭處幽而轉芳芳無遠而不襲賢尚晦而必著
著何道而不入伊哲人之素履盍徵蘭以自執苟馨香之
發聞越江山而采拾

郭炯

炯貞元中進士元和中出爲衡州刺史

西掖瑞柳賦

以應時呈祥聖德昭感爲韻

乾坤至誠草木無情神靈乘化而致理枯朽效祥而發生
當聖澤未沾故兀然枯瘁及天光迴照遂藹爾敷榮因萬
物以咸遂與百祥而畢呈故得垂陰瑣闥之中固本鳳池
之側始孤標而穎拔乍萑弱而條直長充西掖之佳翫迴
奪東門之秀色芬敷自異永垂不朽之名變化無常用表
好生之德懿其萑生漸蔚幹聳惟條拂瑞景而增麗裊祥

風而獨搖可以彰聖王之元感可以見昊天之孔昭舒卷
以時陋梧桐之半死榮枯順理鄙松柏之後凋且春布發
生之慶秋行肅殺之令於天地而不失其常在金木而各
得其性眾皆畢出盡達我則向日而衰眾皆黃落萎腓我
則感時而盛不然何以知至德之動天運神功而瑞聖者
矣翠色泫泫異酒泉嘉柰之祥輕陰澹澹同鄱郡枯梓之
感烟銷雨霽霏素雪於宸居日晏春深雜繁榮於睿覽青
翠葳蕤垂軒拂墀在日月偏臨之處當鴛鴦集苑之時至
矣哉天降靈貺聖爲明證旣得地而不雜眾流常託根而

獨標美稱知是天聽自人而應者也

李復

復貞元中厯官嶺南道節度使

收復瓊州表

瓊州本隸廣府管內乾封中山洞草賊反叛都督李逸控馭失所遂致淪陷已經一百餘年臣差判官監察御史姜孟京崖州刺史張少逸等悉力致討累經苦戰方克舊城便令降人開翦荆榛建立城柵屯集官軍臣竊觀瓊州控壓賊洞若移鎮軍在此必冀永絕姦謀伏望升爲下都督

府仍如瓊崖振儋萬安等五州招討遊奕使其崖州使額請停之

周愿

愿汝南人元和中官兵部員外郎

牧守竟陵因遊西塔著三感說

古人之文有旌物而爲者歌功而爲者詭時而爲者感舊而爲者旌物諡也歌功形也詭時詐也感舊情也若乃折裂金石騷牢鬼神莫尚乎感也予所作者其感舊耶客曰何謂也愿與百越節度使扶風馬公曩時俱爲南海連率

隴西李公復從事公詔移滑臺扶風公泊予又爲幕下賓
從容兩地七改星火今扶風公勲庸滿世文翰飛走續鎮
南海作民父母而愿才貌單薄亦爲刺史繇是二客雙鯉
殷勤於楚越隴西短齡閱川而物故予感一也隴西先人
諱齊物被大德嘗爲竟陵郡守公生於守之日故名復鳴
呼愿以散拙忝公先人之州往爲子寮今刺父郡悲夫隴
西也歌鍾燼滅於池館九原極零乎薤露其感二也愿頻
歲與太子文學陸羽同佐公之幕兄呼之羽自傳竟陵人
當時羽說竟陵風土之美無出吾國予今牧羽國憶羽之

言不誣矣扶風公又悉於羽者也代謂羽之出處無宗祊之籍始自赤子洎乎冠歲爲竟陵苾芻之所生活老奉其教如聲聞辟支以尊乎竺乾聖人也羽字鴻漸百氏之典學鋪在手掌天下賢士大夫半與之遊加以方口諤諤坐能諧謔世無奈何文行如軻所不至者貴位而已矣噫我州之左有覆釜之地圓似頂狀中立塔廟篁大如臂碧籠遺影蓋鴻漸之本師像也悲歟似頂之地楚篁繞塔塔中之僧羽事之僧塔前之竹羽種之竹視天僧影泥破竹枝筠老而羽亦終予作楚牧因來頂中道場白日無羽香火

遐歎零落衣搖楚風其感三也是爲三感說七言詩以語
陳事扶風公覽三感之說豈得不酸涕濕目以著詞致於
塔下冠愿鄙章之首邪

崔行先

行先德宗時人

爲昭義王大夫謝賜改名表

臣某言中使第五守進至伏奉今日日制命授臣開府儀
同三司潞州大都督府司馬知府事充昭義軍節度營田
澤潞邢洺等州觀察留後兼賜名虔休雨露湛恩光臨非

次蜺蜚眇質負戴難勝臣某中謝臣出自行間器識麤淺
理兵從眾問陣無師一心守愚六藝皆闕自謂才無經濟
智乏周防吐誠託人損已待物每日揣分有時撫膺徒生
於此何以報主得免獲戾已足爲榮敢求聞達妄進階級
豈意陛下顥元合德日月在躬竄開獨見之明特降發哀
之詔拔自泥滓致於烟霄臣之榮幸孰與爲比伏以虔休
之義恭諮有章簡自帝心納於臣口自訟增感以榮爲憂
魄散心殞罔知所措况名器所慎春秋格言服之不稱詩
人是刺雖欲勿議誰能捨諸曩日劉元佐之領浚郊李元

諒之居關輔皆勲崇台揆業濟艱難方開加等之恩姑受
錫名之寵臣何爲者坐繼前人三省駑駘未展涓埃之效
百身灰粉何酬天地之恩

爲王大夫謝中使招撫狀

臣某言頃者元誼等擅固城池有違詔命臣出師野次持
守經年以水攻圍俟其離變誓殲兇叛以靜方隅伏以陛
下至德至仁好生惡殺恐失理死不忍誅夷特令中使就
此招撫今洛州收復閭井獲安此皆天威光被神武底定
顧惟愚陋載荷鴻私不勝感戴踊躍之至

爲昭義李相公謝賜臘日口脂狀

右中使某至伏奉敕書墨詔緣大禮後慰問臣及將士官
吏等又緣近臘日便賜臣前件藥物臣謬履鈞衡守茲戎
鎮星霜屢改渥澤逾深內悚外慙不知所措文明啟運殷
薦告成郊廟展嚴禋之儀蒸黎洽時雍之化大宥五刑之
典廣霑萬物之恩自天有慶與人更始臣名器俱忝宸睞
曲臨節近嘉平恩延寵錫香膏凝潤於寶器上藥祕重於
仙方澤變衰顏不知老之將至光生憊質空驚疾乃有瘳
祇奉舊章式披新歷想天長而地久看日往而月來

臘日謝賜口脂紅雪等狀

右中使某至伏奉手詔慰問臣及將士等又緣臘日賜臣口脂紅雪並新厯日等伏以蜡節嘉辰載於六籍皇恩隆洽賚及萬方金膏不祕於上清蘭澤遠傳於中禁加以元霜絳雪素能愈病析醒顧惟賤庸承此恩造隕越無地惶悚失圖縱知死所豈答元造載頒新厯永傳億萬斯年欣奉明時獲辨七十二候

爲王大夫謝恩賜口脂厯日狀

右中使某至伏奉手詔慰撫臣及將士等又賜臘日口脂

金定三月二十二
并新厯日等伏以清祀嘉名載於前典實追歡之盛節亦
和樂之良辰况天休光臨聖慈遐布顧臣賤陋竊奉明恩
感戴周全不知所措蠲邪愈疾驗絳雪於仙方卻老駐顏
觀瓊膏於寶器式頒聖厯仰贊皇猷永爲四海之尊更續
千齡之壽臣不勝歡躍

謝恩賜春衣狀

右中使某至伏奉敕書手詔宣慰臣及將士等兼賜臣春
衣等鴻恩濡澤忽降轅門霧縠冰紈猥加介冑臣等謬膺
委使徒展寸誠曾無逐獸之功每懼伐檀之刺捧受祗慄

不知所裁仰戴恩光將何上答彌憂不稱其服益用內愧
於心

謝恩賜春衣狀

右中使某至伏奉敕書手詔宣慰臣及將吏等又賜前件
春衣臣等駑駘賤品介冑匹夫未彰塵露之功洊及雲雷
之澤喜抃兢惕恍然失圖捧戴恩私不知所據以御府紈
素耀晴景於三春天宮蘭麝襲回風於十步豈土木之質
被服所宜雖灰粉其身上答何極

謝賜貞元寺額狀

右臣昨奏前件亭子及五龍院等伏望天恩賜額爲寺於
當府抽有道行僧二十七人住持修理爲國崇福者伏奉
敕旨允臣所奏賜額爲貞元寺者特沐殊私俯遂愚懇采
寶厯之二字開浮域之一名演皇劫無窮之期示蒼生迴
向之路莫大之福實在於斯且上黨古郡先皇舊藩星辰
曾降於謳謠符瑞見存於圖牒昔爲磐石之地新作布金
之園廣梵宇於域中資聖祚於天上闔境臣庶歡抃難勝
臣忝列藩維戴荷何極

爲昭義李相公賀雲南蠻歸附狀

臣某言伏承雲南羣蠻率其類八國獻款歸附以某月日
至於闕下臣伏惟皇帝陛下端拱九重高視千古聖謨廣
運方昭不宰之功至德柔遠是有非常之慶不然者荒陬
蠻貊左衽烏言文軌未通嗜慾有異不知父子之性獨識
皇王之恩此皆天誘其衷神助其請歸我龍德革彼狼心
豈假渡瀘之師俄同兩階之舞夏啟之征有扈高宗之伐
鬼方書之載籍適足慚恥臣限以守職藩維典茲戎旅不
獲隨列稱賀抃舞丹墀之至

奏差赴唐州行營軍馬狀

右伏奉今日日墨詔令選擇馬軍三百騎隨中使赴唐州
臣當時已具聞奏訖臣所管士馬常經校試蓄銳斯久惟
忠益彰常持報國之心盡秉懷恩之分忽奉詔命頓生光
輝豈意宸私俯察誠願三軍抃舞闔境歡呼並喻以勳忠
形於感激雖慚數寡不愧衆多蔚爲天討之師自假神威
之福其器械軍容等並得鮮潔亦稍豐饒以今月十三日
從鳳翔府隨中使進發訖臣職當護塞志切除奸不獲齒
列諸軍身先士卒助銛鋒於破賊逆節斯摧俾寸燭以燎
原焚枯可待臣無任憤悱踊躍之至

獨孤良弼

良弼貞元間進士官左司郎中

并州太原縣令路公神道碑

夫作德儲祉垂裕錫羨元運之符也以爵馭貴顯親昭孝國令之勸也然則道先於物者靈徵速功備於人者恩典異參厥命數考其慶端至哉太原茂業斯在矣公諱太一陽平臨清人也其先帝譽高辛氏孫曰元元有功於唐堯封路中侯建德賜氏公卽其後襲興圖紀才不虛世迨於隋也曾祖襄位至上儀同三司大長秋令文皇之建極大

父文昇仕至左光祿大夫秦州刺史中宗之紹復烈考元
哲官至并州榆次縣令惇忠淑亮異代同節公淵疑有志
度合尋表心順性命體形格訓至道可鄰浮運可端造融
理極得天地之全者也始年八歲丁尊夫人艱自然崩毀
異日不食旣孤無疑睦幼弟溫慈誘最息更氣時務於勸
誠者每推於教本舉以誨人年十五讀老氏春秋精用所
得不爲虛學以先蔭補太廟齋郎歷衛益齊三州司功參
軍思其官會其要雖決恆務有宏大猷所去之邦服其理
尋擢授并州太原縣令故相國河東公張嘉貞時典此郡

以公諫納今古風韻環朗嘗密謂所親曰雅道不隕今復見於斯人由是有要託始終不隔公禮之分矣其實爲邑之政潔其性源異氣齊和土壤可信出處語默無非教焉及秩滿送歸之日老幼畢至瞻望嗟涕如去其親嗚呼運及世期靈歸化本春秋五十七於歸途逆旅遭疾而終時開元五年八月十三日也夫人滎陽鄭氏始州臨津縣令方喬之女禮部侍郎溫琦之妹清顯闕裔考明閨訓經理於內上則是宣故得叶議純賢誕昭後慶後公十載而沒以開元二十三年合祔於京兆府萬年縣少陵原從先塋

禮也有子四人長曰兼之撫州司法參軍次曰梁客蘇州海鹽縣令次曰羽客鄭州別駕咸該蘊器藝殂命下位季子兵部尚書翼國公贈尚書右僕射嗣恭啟應前休挺傑宏表苞合文武爲朝碩臣城朔方清嶺表乾綱立西北之柱坤位正東南之極夙敷惠術實德於人六專尚書再仗麾鉞於是建國命爵崇廟饗靈寶應初始贈公同州刺史夫人滎陽郡太夫人今聖踐祚遷贈左散騎常侍幽祿之恩照融上徹貴寵之位歷乎兩朝宏密之行光宣二詔且夫體仁居貞含德自保大道之宗也福流來允克昌大業

積善之應也貂冠具服位光近列揚名之義也邊豆有序
饗獻以時罔極之尊也備茲懿典其可已焉建中三年夏
五月孝孫前祕書省著作郎應洎令弟懷州刺史恕前祕
書省校書郎憑天釁崩心血哀過性楚療匍匐旌樹先塋
式遵無念用彰不朽以良弼冀公幕府之舊見託書詞敢
存實錄之紀以成尊祖之業其詞曰

於惟太原貞表峩峩舍爲淵鑒發爲中和大道有本至聖
匪磨雖求其約竟獲其多齟齬歲執喪自然知毀友慈幼弟
已外之已作則三語爲天百里雅器虛融時髦所躋名全

上德壽闕下寮後裔斯顯天監孔昭湛恩被壤宜運登朝
一命五馬再榮八貂東南之原歷世封交重岡轉伏對闕
蒼聳山色靡移松陰不動烈祖之碑孝孫所奉

竇克構

克構故懷澤縣主壻檢校右贊善大夫

請取前銜赴選奏

臣頃以國親超受寵祿及縣主薨逝臣官遂停臣陪位出
身未授檢校官日自有本官伏乞宣付所司許取前銜婺
州司戶參軍隨例詣選

劉宇

宇貞元中官侍御史

河東鹽池靈慶公神祠碑陰記

天作淵極神將宅焉神者何靈化之真宰者也夫神之俶
落實曰監宗閭閻禱之不在祀典先皇朝有元老韓公滉
之總邦賦以大鹹之功康濟是博上以供宗廟之費下以
代田野之租升聞於天請加禮秩帝曰可於是冊爲靈慶
公俎豆之數視於淮濟享謁之期載在王府故及東都留
守禮部尚書崔公縱頃知河中院以神之舊宮僻在幽阻

既崇其禮宜敞厥居是用遷置於斯乃飭殿堂開像設面
齋淪之積水跨邈迤之重岡陰陰森森容衛畢備立卒走
壁儼然如生雖水府靈居未之若也今職方郎中兼侍御
史馮公興纂其是職推置信讓無小無大報之以德頃以
天久不雨慮失其歲職方於是齋心累辰親執牲帛將至
誠之德告靈化之源嘗不朝而雨斯足如是者數四是則
人有德於神神亦有德於人德交歸焉政是用長宜其建
石表異徵文紀靈是以有太常博士崔君之頌也逮夫石
自他山而至文自奉常而來知解縣池詹事府司直陸位

事以道自集商以仁自來知安邑池大理評事韋縱財以清自豐吏以明自肅此二公者以爲職方之精意可達於鬼神如之何不奉矣乃相與就其磨礱覆以棟宇自朔及望揭焉而舉洪範曰潤下作鹹夫敘讚靈慶公陰潛之功亦所以表聖皇澤及於萬姓者也恐其頌或有闕乃命山客重紀於背陰貞元十三年七月二日記

姚綱

綱貞元二十年自水部員外郎除括州刺史元和元年徙湖州卒官

祭研射山神文

去秋徂冬旱旣甚矣分遣官吏徧禱山川爰及春旦大降
甘雨草木滋茂萌芽甲坼我來茲山躬修臣職敬陳報禮
應顯靈德

元友諒

友諒河南人容管經略使結從子

汶川縣唐威戎軍製造天王殿記

至哉天王之盛德也若乃噓大海爲川陸扇須彌爲塵霧
卽藥父眾破修羅屬赫然天王示其威神也住水晶宮護

閻浮界那吒捧塔以前峙天女持花以凝睇示其威福也
懸鹿轡劍秉黃金戟龍蛇鼓怒以騰目神鬼睚眦而捧足
示其威力也天寶中表其神靈衛我唐土化身於于闐之
國摧鋒於百萬之醜使聖聰無勍敵之虞士馬絕奔騰之
患示其變通也汶川古塞戎馬之境山雄玉壘軍壯威戎
有護國精舍凝翠峰疊甘涼泉湧創立天王殿一座其初
也故使惠澄討論之寺主智昕繕成之社眾精肅崇構之
兩變星霜方盡其美我兵馬使賀若崧雷霆在天威戢戎
貊冠簡鼎曜山川載清當其門闢布德之秋桃李成蹊之

日副使彭城劉公命昌輔佐戎軍恆持妙略昔聞飛將今
見輕車判官西河蘭公弇風流倩倩文質彬彬阮元瑜書
記之能王仲宣從軍之樂汝川縣令太原王公昺水鏡臨
人清風偃草邑稱三異名慎四知都虞候及諸大將等弓
張秋月劍落繁霜爲蜀國之長城作轅門之巨壑社衆冉
州守攝判官李建輔等風情廓落文武縱橫俱懷奉主之
心共守安邊之術故能拔倫騰秀宏此聖猷曙起宵興率
先勿替遂感祥光迭委靈氣薦臻十旬不愆貞質山立金
冠照爛寶殿玲瓏山橫棟宇之奇花綻霧嵐之異祐我皇

也弧弓不能壯其威表其神也靈怪不能藏其用寺主智
昕俗姓湯氏梵行沈密道容真清勾當僧惠則俗姓李氏
潔白虛衷秋潭月照俱能輔贊其美宏闡法梁巍峩之勲
萬古不革之道也詞吏仗命敢碑斯文

張賁然

賁然德宗時人

忠武將軍茹公神道碑

在昔帝軒之裔有控帶絕擁據羣雄殆於萬斯年得茹茹
之部謂名王盛族大人鴻胥聯華魏室接慶齊庭鐘鼎焜

耀於數朝土田陪敦於烈辟自拓跋宇文氏降爲著姓焉
則公之先也公諱義忠本家雁門今爲雁門人矣祖惠隋
定州深澤縣丞父簡皇澤州永固府左果毅都尉莫不果
行毓德修身踐言以北方之強爲南金之寶英風雋列海
內知名公特稟元和偏鍾間秀瓌貌傑出雄鋟挺生幼則
知書長遂多藝知人能事靡不盡善有識一見卽以遠大
相期然而家傳崇榮業尚豪舉雖曰雅好博物終恥猶爲
腐儒未嘗不一心殉邊百死許國與孫吳而暗合以驃衛
爲已任開元中以良家子戰功居右補涇州四門府別將

策勲之授也久之秩滿六鈞伎癢七札賈餘厯試粉闥長
驅金埒措杯入妙曾不出正相圃擇賢觀者如堵以武部
試甲科改授河南府王屋府果毅加游擊將軍用絕倫也
累遷汝州魯陽府折衝尋改號州金門府折衝驟增武功
級敘忠武將軍夫其策名委質積行累功祿以實干職無
越請雖晉用之有次亦周行而未高至於幕有急賢司有
渴理乍資規畫爭請於宏羊或藉詞華競留於阮瑀豈直
軍形地勢聚米成圖抑亦國要時須立談集事是亦爲政
奚必褰帷之與綰墨歟但以公之德之才令聞令望執先

府君先夫人之喪也二連之孝聞與上交下交之契也三益之信著在師旅有不可犯之色於鄉黨則謙似不能言寬猛得其中卷舒合夫禮可謂古之文武不墜斌斌君子者矣擁旗旄享茅土亦術內之事耳性頗樂道情兼慕閑每凝想於清高不致身於趨競僂俛芳歲蹉跎後時未展丹心徒嗟白髮命之不偶李廣寧遂於封侯生也有涯賈誼終傷於嘆鵬天寶元年蓋寢疾者浹日以六月十九日薨於京兆長安縣太和里之私第春秋八十嗚呼哀哉梁木壞乎將壇隳矣罷市無喻輟舂如何有才子三伯曰元

顓皇易州遂城府左果毅仲曰元晃左羽林大將軍季曰
元曜則今之驃騎大將軍行左羽林大將軍知軍事上柱
國雁門郡王當斯時也靡不血泣無訴柴毀過人卽以其
七年七月十六日葬於京兆長安縣永平鄉阿房殿之墟
禮也先是夫人陳留郡君謝氏贈沂國太夫人語成圖史
動合禮容德重陶親賢過孟母然而當年桂歇早歲蘭摧
石窞之封徒高薤露之悲終積於戲大業之後景系之餘
間雖陵夷小不進用尋必福履大賢出焉故公以之陰隲
於身善積於物河瀆爲之吐秀山嶽爲之降靈挺然鬱然

生夫驃騎矣皎若片玉粲如渾金明月照人干將立斷長
才廣度茂績殊勲羽林應天上之星雁門封塞下之地公
侯必復斯之謂歟若不然者則頃疑以凶釁次鍾伯早世
克家紹構子然一人而能敘終身之悲展罔極之痛二十
年一有詔贈公爲汾州刺史拜冊於先塋斯亦可謂事親
之禮終哀榮之道備矣且陵或變谷海有爲田滕梓未開
防墓誰辨匪憑不朽之石曷傳無媿之詞爰訪墨卿以述
銘曰

秦殿南趾漢池東曲莽蒼開原蕭條古木吁嗟雁塞赫矣

雄族昔也擬金茲焉埋玉鏤鄒徒挂大屈終藏日色不暖
風枝自傷萬事颯而烟盡片石歸而天長庶德祖之來思
無慚黃絹幸仲宣之見背不墜餘芳